

Greiflet 2017 in Ingenbohl-Brunnen

Plöder zwüschet em feine Ratsherr von Reding und em Resel vo de Hundene

- R E schöne Hinicht midenand, ier Alte und Junge, Grade wie au Chrummä
Schön üch wieder gseh, hie vorem Alphüttli hinderem Dorfbrunnä
Gar rassig sind die zwölf Mönnet ufem Kalender wieder verschtoibe
Es hed mäni eine gar gleitig am Ührli dräht, da bim Petrus überobe
- T Viel Raars a Sünde und Anekdote us em Dorf hemmer hüür nid zäme treit
Es wird hüt afig viel zwenig gspunne und gschiiret, es tued eim schier leid
Früener hed öppe nu eine gschosse imene Fäschztält oder isch bsoffe ume troolet
Hüt lütetets scho a de Polizii aah, wenn de Hündel deheime zluut ume joolet
- R Immer weniger Hotelzimmer chasch i üsem schöne Dörfli gfinde
Und die voorige vos nu hed, sind bsetzt mit «Chinese Grinde»
Um eis Haar hättemer i paar Jahr es Luxushotel chönne gniesse
Wenn sich d'Päris Hilton hätti chönne zum Hüürate entschliesse
Lang, lang hends gmunklet sie welli mit ihrem Lover a Brischtequai abe zügle
Aber sie schmüsed jetz doch lieber mit ihrem Hündäli, das dumm huere Füdle
- T E namelose Greifler sig voreme Jahr richtig Sportplatz im Gras ussä gläge
Mer heigi nid gwüss, läbt er ächt nu oder brucht är scho Gottes Säge
Volle wienä Schiissi und ds'Hirthämmli isch gstande vor Dräck
Und wahrschiindli nu es verbüüleds Triichäli im Handgepäck
D'Polizii hed der Süüniggel nid im suubere IIsatzwage wellä transportiere
Wenn eine e so dräckig isch, söll ne doch d'Ambulanz hei schoffiere
- R Nüsslervater sii a de Fasnacht das isch grossi Ehr und dörf au öppis choschtä
Aber wenn dä Gäldseckel i de Rott inne verlürsch de chasch halt nüme poschtä
Dr Güschtel als Stellvertretändä Schef vo dä Maschgeradä, Meitli und Burschtä
Hed Glück gha, diä Bazäli sind wieder füre cho und är hed nid müässä verdurschtä
- T Nid öppe e böse Wolf tued z'Ingibohl obe sis Unwese triibä
Nei, nei, es sig e Füchsel gsi, tued e Senior i de Ziitig schriibe
E chli wandere und die schön Gägend gniesä hed er wellä
Da tued ihm doch de Brünel vo wiitem scho alli Schand verzellä
«da duruf isch gsperrt wäge Buustell, du alte Wandervogel!»
«Bis dr nüü Gade stahd, bin ich hie Chef übere Wägodel!»

- R Im Horner letschts Jahr, hemmer diä ominösi Abschtimmig gha
dass mer ä sone Nüübuu für Asylantä macht, chani hüt nu nid verstah
Ganz schnell, Ruck Zuck isch das gangä und das Asylheim stahd jetzt scho
Gmeind wetti dank schnelläm Buue nu ä Medaliä oder meh Biiträg übercho
- T Ufgschtigä inä höheri Liga sind diä Fuässballherrä vom FC Brunnä
Doch au mit dem Erfolg schiint im Tschuttplatz ussä nid immer d'Sunnä
Dr Erfolg isch halt äbä krönt mit äs paar usländischä Spieler-Tourischte
Diä hend jetzt all müesse Hei und furt, wäge falsche Visums-Gschichte
- R Im Wandelstubli, hani ghört, heigs für e Gäschte-Parkplätz nüüschtens au ä Parkuhr
Wenn öpper nid zahlt de gäbs ä Buässzättel und das macht de dä Othmärel suur
Es Wiibli isch mid em Fötzel zrugg i Wandel: «Sauerei, wieso han ich der über cho?»
Sie hed aber nid gmerkt, dass der lizahligsschiin vom Gmeindsparkplatz mit isch cho
- T I de Ziiitig und au im Dorf schriibits und verzellids immer vo Brunnä Nord
Sid acht Jahr wird gredet, planet und umägschissä, die schlönd eso jedä Rekord
Jetzt söttis de ändlich vorwärts gah, seid Gmeind mid ihrne Inveschtorä
Ich bi gspannt weviel Arbeitsplätz da chömid oder villicht suächids nu Sponsorä
- R Dä SC Schönebuech macht all Jahr mit sine Chilbihälfer e Fahrt is Blaue
E chli Wandere, plagiere und zwüsched dure e au öppe e chli ine haue
Hüür sind die Sportklübler mit de Standseilbahn i Pilatus ufe gschossä
Und de Präsi Rolf hed im Fühlerstand d'Bedienig vom Bähndli gnossä
Als igfleischte Rigi-Bähndler hed siis Härz vor Freud derart gschlage
«Willkommä uf de Rigi!» hed är d'Gäschtt verabschiedet bim Usschtiige vom Wage
- T Es wälts huere Fäschtt hends gha im Summer ds Estavayer unnä
Das hed Lüt gha ums Sagmähl ume, das isch ja gschpunnä
Driissg Millione Franke tüends im Nünzähni fürs Eidgenössisch in Zug büdgetierä
Es wird nu grösser als im Wältsche, chasch nämlich bis uf Lauerz appe cämpierä
- R Ä Wildtierkorridor das sigi äs Projekt für üsi Hirschä und iri Zuekunft
Doch wem das wieder i Sinn cho isch dem fählt's gläbi chli a dr Vernunft
Im Felderbodä muäss mer de Heckä und Studä setztä und nu vill anderi Sachä
So dass diä arme Tierli bim Wandärä, midenand chönid Versteckis machä
- T Was de Hergott miteme Bärg trännt, sött me nid mit eme Tunnäl verbinde
Jetzt hed de Gottherd halt nu meh Löcher, zwei vore und zwei hinde
Meh Löcher hed bi dr'Eröffnungsfiir nur em Dorisli ihres Chleidli gha
Mä hätt chönne meine sie täg für e Ämmitaler Wärbig vor de Kamera stah

- R Schueh aaleggä chönna muesch nid nur als Chind, nei, au als Maa
 Susch tuesch undereinisch verchert i dene Pantoffle inne stah
 So isch au de Mario vo de Zündhölzler ds'Düsseldorf ume gloffe
 A siim komische Gang aa, hättisch chönne meine är siigi bsoffe
 «Mier tüend d'Füess scho nu weh!» hed er gjammeret wie ne Frau
 Vom Morge bis am Abig d'Schueh verchert ume a, niiaberau!
- T A dr EM ds'Frankriich hed mer i de Nati ä richtigä Eidgenoss müessä suechä
 Trotz denä huffä Secondos mit Starallürä hend sie chönnä ä Siig verbuechä
 Und i eim Gruppäspiili hends nä sogar siebä Natidress vo Puma verrissä
 Diä bluttä Oberkörper wos wäge dem gäh hed, tüänd d'Frauä sicher vermissä
- R Är heissi Riichmueth und nid Armuet, hed er vor Jahre einisch gseid
 Gmeint isch natürlä de Päuk, wo zäntume siini Pauli Burger vertreid
 I d'Republik Gersau hed är siis Gaschtro Imperium chönne expandiere
 Und näbebi au nu is Entsorgigs- und Riseickling Bisness inveschiere
 E schöne Güselwage hed är für das Undernäme ab Platz chönne poschte
 Und em Millione Franz sini Tällstatue abhole, bevor si fahd afe roschte
- T Wenn d'Waldhängschte uf ihrem Huuffä es Achte tüend laufe
 Wird's dusse chalt und höchschi Ziit zum Fondue chaufe
 Das versprächid die drii Wätterprofete hinder ihrem Stubetisch
 «E chli stinke muess es, aber nach Chäs und nid nach Fisch!»
- R E Fremdsprach guet beherrsche isch im Usland immer e grossi Hilf
 Vorallem binere lange Taxifahrt nach Barcelona, susch stasch im Schilf
 E chli z'viel Öl am Huet hends gha die Brunner Buebe
 Bis es am einte gar rassig isch ufgstossä, i de Magegruebe
 «Halt aa, ich muess gu chotzä!» tued aber de Fahrer nid verstah
 «Stoppo Chotzos!» rüeft en andere und er haltet tatsächlich aa
- T Eine vo dene Burschtä isch au ds'Lüende Berti gsi, es isch wahr
 Notwändig hed är z'Barca müessä gu seichä, ufem Heiwäg us de Bar
 «Bis hei magi nümme, z'erscht tue ich jetzt a die Huuswand ane schiffe!»
 Lang isch aber nid gange, hed ihm gar luut es Grüppli Polizischtä zuepiffte
 «45.- Euro Buess choschtet de Gspass!» seid de Maa mit Uniform und Huet
 «Da hesch e Fuffzger» seid de Berti «de Rescht chasch bhalte, isch scho guet!»
- R A dr Ingäbohler-Chilbi isch äs definitiv nümmä so wie früäner
 Nid wäg dr Jungmannschaft und au nid wäg denä vilä jungä Hüähner
 Nei ä Ordniagsdienscht, sonä Securitas muss a derä Chilbi anä, Tag und Nacht
 Drum heigs denä müädä Velofahrer mit ihrer Speichäbeiz kei Spass me gmacht

- T Nüüschdens tued mer z'Ingibohl d'Fischreier mit em Töff vercharrä
 D'Fischer hend natürlı Freud a dem und chönd so Gwehrchügäli sparä
 Im Gätzli obä heigs einä nid ganz verwütscht und sich nu im Gras ussä versteckt
 Doch der Helfer Michel hed bim verbi fahrä das verletztä Federviech grad entdeckt
 Igladä das Vögeli und schnell zum Winzap isch är, der hed em de nu Todesprützä gäh
 Für diä Arztvisite isch de nu ä kuriosi Rächnig i dä Poscht gsi, hemmer chönnä vernäh
- R D'Oberallmig isch am überleggä i Zuekunft Autoränne z'sponsor
 Is Ybrig und is Sahli ine hends scho zwe Streckenä für die 300 PS Motore
 Als Siegerprämie darf de Fahrer e paar Rundenä ufem Chiesplatz drähe
 Und Buure dank dene Tuble id Steihüffä statt durs Gras dure mähe
- T «Fischer, Jäger und andere Lügner» stahd ufärä Tafelä wemer im Stauffacher iichehrt
 Wenn einä meint das Sprichwort stimmi nid, der wird hüt eines Besseren belehrt
 Am eigänä Kamarädli hends ä huerä Seich verzellt und ineghauä i d'Pfannä
 Und dä Wandervogel Petschen halt ä Wuchä z'früeh a Gmeindsversammlig gangä
- R Hüt bisch doch s'Läbe niene meh sicher, es isch erwiese
 Im Otto's wirsch überfalle und det äne stähliids scho d'Rütliwiese
 E chlii Auto aazünde und die halb Nacht gschiire bis es fahd afe tage
 Früener hätt me eso Nachtbuebe öppe eis a Chessel ane gschlage
- T Mier meintid gläschtered hemmer für hüür wieder gnueg
 Drume gömmer jetzt wiiter und nänd nu es Bierli im Chruog
 Gönd is Dorf nu eis gu näh und tüend üses Bruuchtum gniesse
 Bevor die einte schlaue Wirte d'Beiz z'früeh tüend schliesse!
 Usser im Stausee obe, da hends immer super Musig ohni Böxli
 Und chlefele tued de Tschäksen und nid de Nötzli mit de Chlötzli
- R/T Drum wüschid mier üch, ier liebä Lüüt
 viel Xundheit, Freud und Gottes Säge
 Dechi glüpft und undere gläge!

Greiflertanz

Anschliessend an das Plöder findet im **Restaurant Stauffacher** der Greiflertanz statt.

Ab 21.00 Uhr Musik und tolle Greiflerstimmung

mit Rampass

Auf zahlreichen Besuch freuen sich die Musikanten, die Wirtsleute und die
 Greiflervereinigung Ingenbohl-Brunnen